



সমবায়ে গড়ব দেশ, বৈষম্যহীন বাংলাদেশ

# জাতীয় সমবায় পুরস্কার ২০২৩

০২ নভেম্বর ২০২৪ শনিবার



সমবায় অধিদপ্তর

পল্লী উন্নয়ন ও সমবায় বিভাগ

স্থানীয় সরকার, পল্লী উন্নয়ন ও সমবায় মন্ত্রণালয়



সচিব

পল্লী উন্নয়ন ও সমবায় বিভাগ  
স্থানীয় সরকার, পল্লী উন্নয়ন সমবায় মন্ত্রণালয়


## মুখবন্ধ

“সমবায় গড়ব দেশ, বৈষম্যহীন বাংলাদেশ” প্রতিপাদ্য নিয়ে সারাদেশে যথাযথ মর্যাদায় আজ ৫৩তম জাতীয় সমবায় দিবস উদযাপিত হচ্ছে। দেশে সমবায়ের কার্যক্রম যৌক্তিক উপায়ে সম্প্রসারণ এবং গতিশীল করার মাধ্যমে সমবায়ীদের সামাজিক ও অর্থনৈতিক জীবনে সচ্ছলতা আনয়নে এ প্রতিপাদ্যের গুরুত্ব অপরিসীম। আদর্শ, মূল্যবোধ এবং গণতান্ত্রিক অনুশীলনের ক্ষেত্রে সমবায় দর্শন সুশাসনের অন্যতম হাতিয়ার। সমবায় দর্শনকে সঠিকভাবে প্রয়োগ করা সম্ভব হলে বিভিন্ন সেক্টরে বর্তমান সরকারের সংস্কার কার্যক্রম আরো শক্তিশালী, গতিশীল ও কার্যকর হবে।

কৃষিকে কেন্দ্র করে এ উপমহাদেশে সমবায়ের যাত্রা শুরু হলেও বর্তমানে মৎস্য, দুগ্ধ, সঞ্চয় ও ঋণদান, পানি ব্যবস্থাপনা, ক্ষুদ্র ব্যবসা, পরিবহন, পেশাজীবী, পর্যটন, আবাসন, উৎপাদন ও প্রক্রিয়াজাতকরণসহ বিভিন্ন সেক্টরে মোট ৩৫ ক্যাটাগরির সমবায় সমিতি কার্যক্রম পরিচালনা করছে। বর্তমানে সারাদেশে মোট সমবায় সমিতির সংখ্যা প্রায় ১ লক্ষ ৮২ হাজার এবং সমবায়ী প্রায় ১ কোটি ২৪ লক্ষ জন। অর্থনীতিকে গতিশীল করে গড়ে তুলতে আর্থিক প্রতিষ্ঠান হিসেবে সমবায় অঙ্গনেও সংস্কার প্রয়োজন। সে লক্ষ্যে পল্লী উন্নয়ন ও সমবায় বিভাগ সমবায় আইন সংশোধনসহ বিভিন্ন উদ্যোগ গ্রহণ করেছে।

সমবায় অঙ্গনে কৃতিত্বপূর্ণ অবদানের জন্য দেশের শ্রেষ্ঠ সমবায় সমিতি ও শ্রেষ্ঠ সমবায়ীকে সরকার প্রতিবছর জাতীয় সমবায় পুরস্কার প্রদান করে থাকে। সেই ধারাবাহিকতায় সরকারের সিদ্ধান্ত অনুযায়ী এ বছরও জাতীয় সমবায় পুরস্কার ২০২৩ প্রদানের উদ্যোগ গ্রহণ করা হয়েছে। জাতীয় সমবায় পুরস্কার নীতিমালা অনুযায়ী ১৩টি জাতীয় সমবায় পুরস্কার প্রদান করা হয় যার মধ্যে রয়েছে ১০টি সমবায় সমিতি এবং ৩ (তিন) জন সমবায়ী (কমপক্ষে ১ জন মহিলা)। এ বছর সকল শ্রেণিতে পুরস্কার প্রাপ্তির ন্যূনতম মানদণ্ড পূরণ না হওয়ায় জাতীয় কমিটি কর্তৃক ৭টি সমবায় সমিতিকে এবং ৩ জন সমবায়ীকে জাতীয় সমবায় পুরস্কার ২০২৩ প্রদানের সিদ্ধান্ত গৃহীত হয়েছে।

পুরস্কারের জন্য নির্বাচিত সমবায় সমিতি ও সমবায়ীবৃন্দকে আমি আন্তরিক শুভেচ্ছা ও অভিনন্দন জানাই।

  
৩০/১০/২০২৩  
মোসাম্মৎ শাহানারা খাতুন

## শ্রেষ্ঠ সমবায় সমিতি ও সমবায়ী নির্বাচনে জাতীয় কমিটির সভা



জাতীয় সমবায় পুরস্কার ২০২৩ সালের জন্য মনোনয়নপ্রাপ্ত সমবায় সমিতি ও সমবায়ীদের মধ্য থেকে শ্রেষ্ঠ সমবায় সমিতি ও সমবায়ীদের নির্বাচনের জন্য জাতীয় কমিটির সভা পল্লী উন্নয়ন ও সমবায় বিভাগের সম্মেলন কক্ষে অনুষ্ঠিত হয়

# সূচিপত্র

জাতীয় সমবায় পুরস্কার ২০২৩ শ্রেণিভিত্তিক পুরস্কারপ্রাপ্ত সমবায় সমিতি ও সমবায়ী	৪
জাতীয় সমবায় পুরস্কার ২০২৩ শ্রেণিভিত্তিক পুরস্কারপ্রাপ্ত সমবায় সমিতি ও সমবায়ীর পরিচিতি	
কৃষিভিত্তিক/সার্বিক গ্রাম উন্নয়ন সমবায়	৬
সঞ্চয় ও ঋণদান/ক্রেডিট সমবায়	৭
উৎপাদনমুখী সমবায়	৮
ব্যবসায়ী সমবায়	৯
মহিলা সমবায়	১০
পেশাভিত্তিক সমবায়	১১
বিশেষ ও অন্যান্য সমবায়	১২
সমবায়ী, মিশুক সঞ্চয় ও ঋণদান সমবায় সমিতি লিঃ	১৩
সমবায়ী, মাধবকাটি সঞ্চয় ও ঋণদান সমবায় সমিতি লিঃ	১৪
সমবায়ী, বাকলিয়া মহিলা বহুমুখী সমবায় সমিতি লিঃ	১৫

## জাতীয় সমবায় পুরস্কার ২০২৩ শ্রেণিভিত্তিক পুরস্কারপ্রাপ্ত সমবায় সমিতি ও সমবায়ী

ক্র. নং	শ্রেণিভিত্তিক সমবায় সমিতি ও সমবায়ী	সমবায় সমিতি/সমবায়ীর নাম ও ঠিকানা
১.	কৃষিভিত্তিক/সার্বিক গ্রাম উন্নয়ন সমবায়	হারুয়ালছড়ি খাল পানি ব্যবস্থাপনা সমবায় সমিতি লিঃ উপজেলা: ফটিকছড়ি, জেলা: চট্টগ্রাম
২.	সঞ্চয় ও ঋণদান/ক্রেডিট সমবায়	গোপালনগর কো-অপারেটিভ ক্রেডিট ইউনিয়ন লিঃ উপজেলা: মুজিবনগর, জেলা: মেহেরপুর
৩.	উৎপাদনমুখী সমবায়	পোতাজিয়া প্রাথমিক দুগ্ধ উৎপাদনকারী সমবায় সমিতি লিঃ উপজেলা: শাহজাদপুর, জেলা: সিরাজগঞ্জ
৪.	ব্যবসায়ী সমবায়	পাইকগাছা কাঁকড়া ব্যবসায়ী সমবায় সমিতি লিঃ উপজেলা: পাইকগাছা, জেলা: খুলনা
৫.	মহিলা সমবায়	একতা মহিলা সমবায় সমিতি লিঃ থানা: শাহ আলী, জেলা: ঢাকা
৬.	পেশাভিত্তিক সমবায়	আইসিডিডিআর,বি কর্মচারীবৃন্দের বহুমুখী সমবায় সমিতি লিমিটেড থানা: তেজগাঁও, জেলা: ঢাকা
৭.	বিশেষ ও অন্যান্য সমবায়	বাংলাদেশ পুলিশ কো-অপারেটিভ সোসাইটি লিঃ থানা: রমনা, জেলা: ঢাকা
৮.	সমবায়ী	জনাব মারুফ বিল্লাহ, সম্পাদক, মিশুক সঞ্চয় ও ঋণদান সমবায় সমিতি লিঃ উপজেলা: দিঘলিয়া, জেলা: খুলনা
৯.	সমবায়ী	জনাব দিপংকর মন্ডল, সভাপতি, মাধবকাটি সঞ্চয় ও ঋণদান সমবায় সমিতি লিঃ উপজেলা: ডুমুরিয়া, জেলা: খুলনা
১০.	সমবায়ী	জনাব রীনা বেগম, ম্যানেজার, বাকলিয়া মহিলা বহুমুখী সমবায় সমিতি লিঃ উপজেলা: বাকলিয়া, জেলা: চট্টগ্রাম

# জাতীয় সমবায় পুরস্কার ২০২৩

শ্রেণিভিত্তিক পুরস্কারপ্রাপ্ত সমবায় সমিতি ও  
সমবায়ীর পরিচিতি

## কৃষিভিত্তিক/সার্বিক গ্রাম উন্নয়ন সমবায়



## হাৰুয়ালছড়ি খাল পানি ব্যবস্থাপনা সমবায় সমিতি লিঃ

উপজেলা: ফটিকছড়ি

জেলা: চট্টগ্রাম



চট্টগ্রাম জেলার ফটিকছড়ি উপজেলায় এলজিইডি-র উদ্যোগে সমবায় দপ্তর কর্তৃক হাৰুয়ালছড়ি খাল পানি ব্যবস্থাপনা সমবায় সমিতি লিঃ ২০১১ সালে নিবন্ধিত হয়। বর্তমানে সদস্য ২,১৩২ জন। কার্যকরী মূলধন প্রায় ৫ কোটি ৫০ লক্ষ টাকা। ধান উৎপাদন, সবজি উৎপাদন, পোল্ট্রি খামার, ফসলী জমিতে সমহারে পানি বন্টন, কৃষকদের ন্যায্য মূল্যে বীজ, সার ও কীটনাশক সরবরাহ, ঋণ কার্যক্রম, সেলাই প্রশিক্ষণ কার্যক্রম, সেচ প্রকল্প, ড্রেন নির্মাণ সমিতিটির উল্লেখযোগ্য উন্নয়ন কার্যক্রমের মধ্যে অন্যতম। মামলা সংক্রান্ত অসহায় ব্যক্তিদের আইনি পরামর্শ প্রদান, গরীবদের সাহায্য প্রদান, গরীব মেয়েদের বিয়েতে অনুদান প্রদান, ছাত্র/ছাত্রীদের শিক্ষা বৃত্তি প্রদান ইত্যাদি সমাজ সেবামূলক কার্যক্রম করে থাকে। সমিতিটি সেচ কার্যক্রম পরিচালনার মাধ্যমে প্রকল্পভুক্ত এলাকায় কৃষি উৎপাদন বৃদ্ধি এবং সদস্যদের কর্মসংস্থানের সুযোগ সৃষ্টি ও তাদের আর্থসামাজিক উন্নয়নে অবদান রাখায় এ বছর কৃষিভিত্তিক/সার্বিক গ্রাম উন্নয়ন সমবায় ক্যাটাগরিতে শ্রেষ্ঠ সমবায় সমিতি হিসাবে 'হাৰুয়ালছড়ি খাল পানি ব্যবস্থাপনা সমবায় সমিতি লিঃ' কে ২০২৩ সালের জাতীয় সমবায় পুরস্কার প্রদান করা হলো।

## শ্রেণি ২

### সঞ্চয় ও ঋণদান/ক্রেডিট সমবায়

#### গোপালনগর কো-অপারেটিভ ক্রেডিট ইউনিয়ন লিঃ

উপজেলা: মুজিবনগর  
জেলা: মেহেরপুর

১৯৯৫ সালে প্রতিষ্ঠিত হয় গোপালনগর কো-অপারেটিভ ক্রেডিট ইউনিয়ন লিঃ। বর্তমানে সদস্য ৩,৭৭০ জন এবং কার্যকরী মূলধন প্রায় ৩৩ কোটি ২৩ লক্ষ টাকা। সমিতির নিজস্ব ৪ শতক জমির উপর ৪তলা বিশিষ্ট পাকা দালানে অফিস ঘর ও প্রশিক্ষণ কক্ষ রয়েছে। সমিতি কর্তৃপক্ষ হাসপাতাল প্রকল্প ও ব্যবসা প্রকল্পে বিনিয়োগ করেছে যার পরিমাণ: প্রায় ৯ (নয়) কোটি টাকা। সমিতি থেকে বিভিন্ন ট্রেডে প্রকল্প ঋণ গ্রহণ করে প্রায় ২,৫০০ জন সদস্য স্ব-কর্মসংস্থান সৃষ্টিতে সফল হয়েছেন। সমিতি প্রতি বছর সদস্যদের সন্তানদের শিক্ষা উপবৃত্তি ও আর্থিক অনুদান, সদস্যদের মাঝে গবাদি পশু মোটাতাজাকরণ, হাঁস-মুরগি পালন, কৃষি কাজ ও ক্ষুদ্র ব্যবসায় স্বল্প লাভে ঋণ সহায়তা প্রদান করে থাকে। এ সমিতি এলাকায় স্পন্সরশিপ প্রদানের মাধ্যমে যুব ও ক্রীড়া উন্নয়নে গুরুত্বপূর্ণ ভূমিকা পালন করে থাকে। সমিতির জমিতে নিজস্ব অর্থায়নে ডায়গনস্টিক সেন্টার নির্মাণ প্রকল্প এবং একটি ইংলিশ মিডিয়াম স্কুল প্রতিষ্ঠার পরিকল্পনা বাস্তবায়নাধীন। সদস্যদের আর্থসামাজিক উন্নয়নে গৃহীত উদ্যোগ বিবেচনায় এ বছর সঞ্চয় ও ঋণদান/ক্রেডিট সমবায় ক্যাটাগরিতে শ্রেষ্ঠ সমবায় সমিতি হিসাবে 'গোপালনগর কো-অপারেটিভ ক্রেডিট ইউনিয়ন লিঃ' কে ২০২৩ সালের জাতীয় সমবায় পুরস্কার প্রদান করা হলো।




শ্রেণি ৩

উৎপাদনমুখী সমবায়



পোতাজিয়া প্রাথমিক দুগ্ধ উৎপাদনকারী সমবায় সমিতি লিঃ

উপজেলা: শাহজাদপুর  
জেলা: সিরাজগঞ্জ



শাহজাদপুর উপজেলার পোতাজিয়া গ্রামে স্থানীয় দুধের চাহিদা মেটাতে সদস্যদেরকে দুধ উৎপাদনে উৎসাহিত করে ১৯৭৩ সালে পোতাজিয়া প্রাথমিক দুগ্ধ উৎপাদনকারী সমবায় সমিতি লিঃ প্রতিষ্ঠিত হয়। কার্যকরী মূলধন প্রায় ৫০ লক্ষ টাকা। বর্তমানে ৩৪২ সদস্যের সমিতিটি বাংলাদেশ দুগ্ধ উৎপাদনকারী সমবায় ইউনিয়ন লিঃ (মিল্কভিটা) এর সদস্যপদ গ্রহণ করে উৎপাদিত দুধ সিরাজগঞ্জ জেলার বাঘাবাড়ি কারখানায় সরবরাহ করছে। গাভী প্রজননে বৈজ্ঞানিক পদ্ধতির সূচনা করে উন্নত জাতের গরু প্রজননসহ দুগ্ধ উৎপাদন বৃদ্ধিতে বেশ সহায়ক ভূমিকা পালন করেছে। তরল দুগ্ধ এবং উন্নত জাতের গাভী পালনের কলাকৌশলে সভ্যদেরকে স্বাবলম্বী করা, পোতাজিয়া গ্রামের রাস্তাঘাট, নর্দমা, মজাপুকুর প্রভৃতি পরিষ্কার-পরিচ্ছন্ন রাখা, সদস্যদের উৎপাদিত দুধের মান নিয়ন্ত্রণ করে তা যথাযথভাবে সংগ্রহ ও সরবরাহ প্রভৃতির মাধ্যমে সমিতিটি এ অঞ্চলে উল্লেখযোগ্য ভূমিকা রেখে আসছে। সমিতির সার্বিক কার্যক্রম বিবেচনায় এ বছর উৎপাদনমুখী সমবায় ক্যাটাগরিতে শ্রেষ্ঠ সমবায় সমিতি হিসাবে 'পোতাজিয়া প্রাথমিক দুগ্ধ উৎপাদনকারী সমবায় সমিতি লিঃ' কে ২০২৩ সালের জাতীয় সমবায় পুরস্কার প্রদান করা হলো।

## শ্রেণি ৪

### ব্যবসায়ী সমবায়

#### পাইকগাছা কাঁকড়া ব্যবসায়ী সমবায় সমিতি লিঃ

উপজলো: পাইকগাছা

জেলা: খুলনা

পাইকগাছা কাঁকড়া ব্যবসায়ী সমবায় সমিতি লিঃ ২০০১ সালে খুলনা জেলার পাইকগাছা উপজেলায় প্রতিষ্ঠিত হয়। বর্তমানে এর সদস্য ৩২৮ জন। সমিতির কার্যকরী মূলধনের পরিমাণ ১ কোটি ৮ লক্ষ টাকার অধিক। পাইকগাছা থানা কেন্দ্রীয় জামে মসজিদ মার্কেটে সমিতির নিজস্ব কার্যালয় অবস্থিত। বাতিখালী মৌজায় ২ (দুই) শতক জমি ক্রয়সহ কাঁকড়া চাষীদের প্রশিক্ষণের জন্য একটি ট্রেনিং সেন্টার রয়েছে। সমিতির সদস্যদের চাকৃত কাঁকড়া এবং ক্রয়কৃত কাঁকড়া সমিতির মাধ্যমে পরিচালিত পিকআপে সরাসরি ঢাকায় রপ্তানিকারকদের মাধ্যমে চায়না, তাইওয়ান, মালয়েশিয়া ও হংকং রপ্তানি হয়। সমিতির মাধ্যমে প্রায় ২২ হাজার লোকের পরোক্ষ কর্মসংস্থান তৈরি হয়েছে। ‘ব্যবসায়ী’ সমিতি হওয়ায় বিভিন্ন প্রকল্প বাস্তবায়ন করে সমিতির সদস্যদের ভাগ্যোন্নয়ন ও স্থায়ী আয়ের উৎস সৃষ্টি করা হয়েছে। বাতিখালী ও শিবেরবাটি মৌজায় জমি ক্রয়পূর্বক ইজারা এবং সমিতির ক্রয়কৃত বাতিখালী থানা মসজিদ মার্কেটে ঘর ভাড়া প্রদান করা হয়েছে। একটি আদর্শ ও অনুসরণীয় সমিতি হিসেবে বৈদেশিক মুদ্রা অর্জন ও কর্মসংস্থান সৃষ্টির স্বীকৃতিস্বরূপ ‘পাইকগাছা কাঁকড়া ব্যবসায়ী সমবায় সমিতি লিঃ’ কে এবছর ব্যবসায়ী সমবায় ক্যাটাগরিতে শ্রেষ্ঠ সমবায় সমিতি হিসাবে ২০২৩ সালের জাতীয় সমবায় পুরস্কার প্রদান করা হলো।



## শ্রেণি ৫ মহিলা সমবায়

### একতা মহিলা সমবায় সমিতি লিঃ

থানা: শাহআলী  
জেলা: ঢাকা



২০০৬ সালে একতা মহিলা সমবায় সমিতি লিঃ এর যাত্রা শুরু হয়। বর্তমানে সমিতির সদস্য ২৪৭৬ জন এবং কার্যকরী মূলধনের পরিমাণ প্রায় ৮ কোটি ১৫ লক্ষ টাকা। হাউজিং প্রকল্প, মিনি গার্মেন্টসের মাধ্যমে সমিতির লভ্যাংশ বৃদ্ধি পায়। কর্মজীবী শিশুদের নৈশ স্কুলের ব্যবস্থা, পথ শিশুদের পুষ্টিকর খাবারের ব্যবস্থা, গর্ভবতী মায়ের সুচিকিৎসা ও পুষ্টিকর খাবারের ব্যবস্থা, দরিদ্র ছাত্র-ছাত্রীদের উপবৃত্তির ব্যবস্থা, টিকাদান কর্মসূচী, বিনামূল্যে সেলাই প্রশিক্ষণ, কম্পিউটার, ব্লক-বাটিক, গার্মেন্টস অপারেটর, বিউটি পার্লার, ইলেকট্রিক, ফ্যাশন ডিজাইন, মার্চেভাইজিং, বি.ডি.এস. ইত্যাদি প্রশিক্ষণের ব্যবস্থা গ্রহণ করা হয়েছে। সমিতি কর্তৃক ৪৯ জনের পরোক্ষ কর্মসংস্থান হয়েছে। এছাড়াও সমিতির সদস্যগণ সমিতি হতে ঋণ গ্রহণ করে নিজেদের আর্থ-সামাজিক অবস্থার উন্নয়ন করে চলেছে। সদস্য ও এলাকার জনসাধারণের জন্য বিভিন্ন সেবামূলক ও সামাজিক সচেতনতামূলক কর্মকাণ্ড পরিচালনার ক্ষেত্রে গুরুত্বপূর্ণ অবদান রাখার স্বীকৃতিস্বরূপ 'একতা মহিলা সমবায় সমিতি লিঃ' কে এ বছর মহিলা সমবায় ক্যাটাগরিতে শ্রেষ্ঠ সমবায় সমিতি হিসাবে ২০২৩ সালের জাতীয় সমবায় পুরস্কার প্রদান করা হলো।

## শ্রেণি ৬


### পেশাভিত্তিক সমবায়

## আইসিডিডিআর,বি কর্মচারীবৃন্দের বহুমুখী সমবায় সমিতি লিমিটেড

থানা: তেজগাঁও

জেলা: ঢাকা

ঢাকা জেলার প্রাণকেন্দ্র মহাখালীতে ১৯৭২ সালে আইসিডিডিআর,বি কর্মচারীবৃন্দের বহুমুখী সমবায় সমিতি লিমিটেড প্রতিষ্ঠিত হয়। বর্তমানে এর সদস্য ২৩৬৮ জন। কার্যকরী মূলধন প্রায় ১১০ কোটি ৮৩ লক্ষ টাকা। সমবায়ীদের সেবা ও সহায়তা প্রদানের লক্ষ্যে সুলভ মূল্যে সমিতির হাউজিং স্কিম, স্যালাইন প্রকল্প, ফটোকপি ও গাড়ি প্রকল্পের মাধ্যমে সমিতির সদস্যদের চলাচলের ব্যবস্থার মাধ্যমে কল্যাণমুখী প্রকল্প বাস্তবায়ন অব্যাহত রেখেছে। এছাড়া দরিদ্র রোগীদের বিনামূল্যে চিকিৎসায় অংশগ্রহণের লক্ষ্যে আইসিডিডিআর,বিকে এক লক্ষ টাকা দান করে। সদস্যগণকে মহাজনী রাহুমুক্ত হওয়ার জন্যে ব্যক্তিগত সর্বোচ্চ ৪০ লক্ষ টাকা ঋণ গ্রহণ করার সুযোগ দেয়া হয়। আইসিডিডিআর,বি, ঢাকা কর্তৃক সমিতির নামে ৬৮, শহীদ তাজউদ্দিন আহমেদ সরণি, মহাখালী ঢাকায় ৯০০ স্কয়ার ফিটের একটি ফ্লোর কার্যক্রম পরিচালনার জন্য বরাদ্দ প্রদান করা হয়। ৮০০-র অধিক কর্মসংস্থান সৃষ্টি হয়েছে। সমিতির উন্নয়ন ও সমাজকল্যাণমূলক কার্যক্রম বিবেচনায় এ বছর পেশাভিত্তিক সমবায় ক্যাটাগরিতে শ্রেষ্ঠ সমবায় সমিতি হিসাবে ‘আইসিডিডিআর,বি কর্মচারীবৃন্দের বহুমুখী সমবায় সমিতি লিমিটেড’ কে ২০২৩ সালের জাতীয় সমবায় পুরস্কার প্রদান করা হলো।



## বাংলাদেশ পুলিশ কো-অপারেটিভ সোসাইটি লিঃ

থানা: রমনা  
জেলা: ঢাকা

বাংলাদেশ পুলিশ বাহিনী তাদের সকল পর্যায়ের কর্মকর্তা/কর্মচারীদের আর্থসামাজিক উন্নয়নের লক্ষ্যে সমবায়ের আদর্শে উজ্জীবিত হয়ে বাংলাদেশ পুলিশ কো-অপারেটিভ সোসাইটি লিঃ নামে সমবায় বিভাগ থেকে বিগত ১৯৬০ সালের ১৬ ফেব্রুয়ারি নিবন্ধন গ্রহণ করেন। সমিতিটির বর্তমান সদস্য সংখ্যা ১,০৫,২৯৩ জন। কার্যকরী মূলধন প্রায় ২৬ কোটি ৫৮ লক্ষ টাকা। এই সমিতির সভাপতি পদাধিকার বলে বাংলাদেশ পুলিশের ইন্সপেক্টর জেনারেল পদায়িত থাকেন। এই সমিতির উল্লেখযোগ্য প্রকল্পগুলোর মধ্যে পলওয়েল সুপার মার্কেট, পলওয়েল কারনেশন সেন্টার, জোনাকী সিনেমা হল, পলওয়েল আবাসন প্রকল্প এবং পলওয়েল সিএনজি ফিলিং স্টেশন প্রকল্প উল্লেখযোগ্য। সমিতির সদস্যদের স্থায়ী আবাসন ব্যবস্থা, সদস্যদের চিকিৎসা সহায়তা, ছেলে-মেয়েদের শিক্ষাবৃত্তি, শিক্ষা সহায়তা এবং প্রকল্প গ্রহণের মাধ্যমে সাধারণ মানুষদের কর্মসংস্থান সৃষ্টিতে বিশেষ ভূমিকা পালন করে যাচ্ছে। সমিতির সার্বিক কার্যক্রম বিবেচনায় এ বছর বিশেষ ও অন্যান্য সমবায় ক্যাটাগরিতে শ্রেষ্ঠ সমবায় সমিতি হিসাবে 'বাংলাদেশ পুলিশ কো-অপারেটিভ সোসাইটি লিঃ' কে ২০২৩ সালের জাতীয় সমবায় পুরস্কার প্রদান করা হলো।

## সমবায়ী

### জনাব মারুফ বিল্লাহ

উপজেলা: দিঘলিয়া  
জেলা: খুলনা

জনাব মারুফ বিল্লাহ এর নেতৃত্বে ৩০ জন সমমনা বন্ধুদের উদ্যোগে ২৭/০৭/২০১৪ তারিখে মিশুক সঞ্চয় ও ঋণদান সমবায় সমিতি লিঃ সমবায় বিভাগের নিবন্ধন লাভ করেন। সমিতির শুরু থেকেই তিনি ফলপ্রসূ উদ্যোগ গ্রহণ করে সমিতির পুঁজি গঠন ও সম্পদ বৃদ্ধিতে অবদান রেখে চলেছেন। সম্পাদক হিসেবে তাঁর কঠোর পরিশ্রম, দৃঢ় প্রত্যয় ও ব্যক্তিগত উদ্যোগের কারণেই সমিতির প্রতিষ্ঠাকালীন মূলধন মাত্র ৪২,০০০ টাকা থেকে বর্তমানে প্রায় ৫ কোটি ১৩ লক্ষ টাকায় উন্নীত হয়েছে। সমবায়ী হিসেবে সমবায় উদ্যোক্তা সৃষ্টি, সমিতির হিসাব সংরক্ষণ, উদ্যোক্তা উন্নয়ন, এস.এম.ই, কম্পিউটার প্রশিক্ষণ গ্রহণ করেছেন। সমিতির নিজস্ব অর্থায়নে সুন্দরবন থেকে সংগৃহীত খাঁটি মধু বিপণন, মৌসুমী ফসলের ব্যবসার প্রকল্প গ্রহণ ও বাস্তবায়নে তাঁর ভূমিকা রয়েছে। এছাড়া সদস্যদের আবাসন সমস্যা সমাধানের লক্ষ্যে মিশুক আবাসন প্রকল্পে তার তত্ত্বাবধানে সমিতির নিজস্ব মূলধন দ্বারা ০৫টি প্লট/সাইট ক্রয় করা হয়েছে। ঋণ প্রকল্প সমিতির সদস্যদের মাঝে ঋণ বিতরণ প্রকল্পে তিনি চালিকা শক্তি হিসেবে কাজ করেন। তাঁর নিরলস পরিশ্রমে সমিতির সদস্যের ২৩২ জনকে ক্ষুদ্র ও মাঝারি উদ্যোক্তা তৈরি করতে সক্ষম হয়েছেন। সমিতির কর্ম এলাকায় বিভিন্ন প্রকল্প গ্রহণ ও বাস্তবায়নে এবং কর্মসংস্থান সৃষ্টিতে তার উল্লেখযোগ্য অবদানের জন্য জনাব মারুফ বিল্লাহকে এ বছর শ্রেষ্ঠ সমবায়ী হিসেবে ২০২৩ সালের জাতীয় সমবায় পুরস্কার প্রদান করা হলো।



সমবায়ী

## জনাব দিপংকর মন্ডল

উপজেলা: ডুমুরিয়া  
জেলা: খুলনা

জনাব দিপংকর মন্ডল প্রতিষ্ঠাতা সদস্য হিসেবে বিগত ০৫/১১/২০১১ তারিখে মাধবকাটি সঞ্চয় ও ঋণদান সমবায় সমিতি লিঃ এর সদস্য পদ লাভ করেন। তাঁর কঠোর পরিশ্রম, দৃঢ় প্রত্যয় ও ব্যক্তিগত উদ্যোগের কারণেই সমিতিটির মূলধন বর্তমানে ৩ কোটি টাকা। সমিতির নিজস্ব জমি ও সম্পদের বর্তমান মূল্য প্রায় ২৬ লক্ষ টাকা। তিনি সমিতির প্রতিষ্ঠাকালীন সভাপতি ছিলেন। সমিতিতে তাঁর ব্যক্তিগত শেয়ার ৪ লক্ষ ৮৬ হাজার ৫০০ টাকা। তাঁর প্রচেষ্টায় সমিতির নিজস্ব অর্থায়নে মৎস্য খামার প্রকল্প, কৃষি খামার প্রকল্প, বিভিন্ন ট্রেডে ঋণ প্রকল্প, গবাদী পশু পালন খামার প্রকল্প বাস্তবায়ন করা হচ্ছে। তাঁর যোগ্য নেতৃত্ব ও সমন্বয়যোগী ভূমিকার ফলে সমিতিতে স্থায়ীভাবে ৩জন এবং কৃষি, মৎস্য, গবাদীপশু পালন, পোল্ট্রিশিপি ৬০০ জনের অধিক স্ব-কর্মসংস্থান সৃষ্টি হয়েছে। তাঁর ঐকান্তিক প্রচেষ্টায় সমিতির এলাকার মূল সড়কের দীর্ঘ ৫ কিলোমিটার সড়কের দু'পাশে তিনি বৃক্ষ রোপণ করেছেন। তিনি স্থানীয় কয়েকটি শিক্ষা প্রতিষ্ঠানের দরিদ্র স্কুল শিক্ষার্থীদের শিক্ষা উপকরণ প্রদান এবং গ্রামের অস্বচ্ছল সদস্যদের মুনাফা ছাড়া ঋণের মাধ্যমে উন্নত পাকা বাড়ি তৈরির জন্য অর্থ সরবরাহ ও তদারকি করেন। সমিতির কর্ম এলাকায় বিভিন্ন প্রকল্প গ্রহণ ও বাস্তবায়নে তার উল্লেখযোগ্য অবদানের জন্য জনাব দিপংকর মন্ডলকে এ বছর শ্রেষ্ঠ সমবায়ী হিসেবে ২০২৩ সালের জাতীয় সমবায় পুরস্কার প্রদান করা হলো।

## সমবায়ী


### জনাব রীনা বেগম

উপজেলা: বাকলিয়া  
জেলা: চট্টগ্রাম

জনাব রীনা বেগম গত ২৬/০১/২০০৭ তারিখে বাকলিয়া মহিলা বহুমুখী সমবায় সমিতি লিঃ এর সদস্যপদ গ্রহণ করেন। আইজিএ (বেসিক কম্পিউটার), সমবায় উদ্যোক্তা সৃষ্টি, সমবায় ব্যবস্থাপনা, ই-কমার্স ও দক্ষতা বৃদ্ধি, সমবায় নেতৃত্ব, আইন ও কর্মী ব্যবস্থাপনা কৌশল বিষয়ে প্রশিক্ষণ গ্রহণ করেন। সমিতির অর্থায়নে আচার তৈরি, ক্রিস্টাল পণ্য ও শো পিস, জুয়েলারি, ব্লক বাটিক, সেলাই, কাটিংসহ বিভিন্ন আয়বর্ধক প্রশিক্ষণ আয়োজন করে সদস্যদের আত্ম-কর্মসংস্থান সৃষ্টির মাধ্যমে ৬০ জন নারী উদ্যোক্তা সৃষ্টিতে সহায়ক ভূমিকা রাখতে সক্ষম হয়েছেন। তাঁর ঐকান্তিক প্রচেষ্টায় ক্ষুদ্র ব্যবসা, ক্ষুদ্র গার্মেন্টস কারখানা তৈরির মাধ্যমে সমিতির সদস্যদের কর্মসংস্থানের সুযোগ সৃষ্টি এবং ভাগ্য পরিবর্তনে তিনি কাজ করে যাচ্ছেন। তাঁর উদ্যোগে ১০০০ জন নারীর পরোক্ষ কর্মসংস্থান সৃষ্টি করেছে। সমিতির কর্ম এলাকায় বিভিন্ন প্রকল্প গ্রহণ ও বাস্তবায়নে, কর্মসংস্থান সৃষ্টি এবং নারীর ক্ষমতায়নে তার উল্লেখযোগ্য অবদানের জন্য জনাব রীনা বেগমকে এ বছর শ্রেষ্ঠ সমবায়ী হিসেবে ২০২৩ সালের জাতীয় সমবায় পুরস্কার প্রদান করা হলো।







## সমবায় ভবন

এফ-১০, সিভিক সেন্টার, শেরে-ই-বাংলা নগর, আগারগাঁও, ঢাকা-১২০৭  
[www.coop.gov.bd](http://www.coop.gov.bd)

